



XALQ DEPUTATLARI BULUNG'UR TUMAN KENGASHINING Q A R O R I

17 - fevral 2021-yil

134/24 -son

Bulung'ur tumani prokurori S.Saidovning qonuniylikni mustahkamlash, fuqarolarning huquq va erkinliklarini muhofaza qilish, jinoyatchilik va huquqbuzarliklarning oldini olish borasida 2020 yilda amalga oshirilgan ishlari to'g'risida

Bulung'ur tumani prokuraturasi tomonidan 2020 yil davomida tumanda qonuniylikni mustahkamlash, fuqarolarning huquq va erkinliklarini muhofaza qilish, jinoyatchilik va huquqbuzarliklarning barvaqt oldini olish borasida amalga oshirilgan ishlar natijadorligini yanada oshirish maqsadida xalq deputatlari Bulung'ur tumani Kengashi 24 sessiyasi

QAROR QILADI:

1. Bulung'ur tumani prokurori S.Saidovning "Hududda qonuniylikni mustahkamlash, fuqarolarning huquq va erkinliklarini muhofaza qilish, jinoyatchilik va huquqbuzarliklarning oldini olish borasida 2020 yilda amalga oshirilgan ishlari to'g'risida"gi axboroti ma'lumot uchun qabul qilinsin.

2. Tuman prokurori (S.Saidov), tuman hokimining birinchi o'rinbosari (D.Xabibullaev), tuman hokimining o'rinbosari, mahalla va oilani qo'llab quvvatlash bo'limi boshlig'i (A.Xazratkulov), tuman Bandlikka ko'maklashish markazi direktori (B.Bosimov)larga:

O'zbekiston Respublikasi Qonunlari, O'zbekiston Respublikasi Prezidentining Farmonlari, qarorlari, farmoyishlari, Vazirlar Mahkamasining qarorlari hamda Davlat dasturlari ijrosini ta'minlash;

mansabdor shaxslarning o'zlariga yuklatilgan vazifalarni bajarishdagi mas'uliyatini oshirish choralarini belgilash va amalga oshirish;

tuman 2-sektori hududida "Ehtiyojmand oila" sifatida ro'yxatga olinganlarning moddiy ta'minoti, yashash sharoitini yaxshilash, bandligini ta'minlash va

kambag'allikdan chiqarish bo'yicha kompleks chora-tadbirlarni amalga oshirib, natijasi bo'yicha Kengashga ma'lumot kiritib borish;

tadbirkorlik faoliyatini yo'lga qo'yish istagini bildirgan yoshlar va xotin-qizlarning tadbirkorlik ko'nikmalarini oshirish maqsadida o'quvlar tashkil etish, biznes loyihalarini tuzishda amaliy yordam ko'rsatish;

zo'rlik ishlatishdan jabr ko'rgan shaxslarni, huquqlari va qonuniy manfaatlari buzilgan xotin-qizlarni reabilitatsiya qilish bo'yicha moslashtirish tuman bo'linmasi, tuman bandlik bo'limi, "Ayollar maslahat kengashi"larida, "Xotin-qizlar huquqiy psixologik maslahatxonasi" va ta'lim muassasalaridagi malakali psixologlar tomonidan psixologik maslahatlar berib borilishini tashkil qilish;

O'zbekiston Respublikasi Prezidentining hududlarda byudjetga qo'shimcha tushumlar va mahsulot ishlab chiqarish hajmini ko'paytirish orqali narxlar barqarorligini ta'minlash, inflyasiyaning oldini olishda mahalliy ijro hokimiyati organlari, soliq va moliya idoralari rahbarlarining shaxsiy mas'uliyati va javobgarligini oshirish;

O'zbekiston Respublikasi Prezidentining Xalq qabulxonasi va virtual qabulxonasi, tuman hokimligiga kelgan jismoniy va yuridik shaxslar murojaatlarini qonunda belgilangan muddatda ko'rib chiqilishini ta'minlash;

tadbirkorlik sub'ektlari faoliyatini rivojlantirish maqsadida ishlab chiqilgan dasturlar ustidan jamoatchilik nazoratini kuchaytirish. Kichik va o'rta biznesni keng qo'llab-quvvatlash va faoliyatiga to'siq bo'layotgan omillarni bartaraf etish choralari belgilash va amalga oshirish;

sog'liqni saqlashga qaratilgan qonun va qarorlar ustidan jamoatchilik nazoratini kuchaytirish;

ishsiz yoshlarni tarmoq va hududiy investitsiya dasturlariga kiritilgan loyihalarda yaratilayotgan yangi ish o'rinlariga, mavjud vakansiya va zahira (kvota) ish o'rinlariga, haq to'lanadigan jamoat ishlariga, kasb-hunarga va tadbirkorlikka o'qitish orqali jalb etish, o'zini o'zi mustaqil band qilish faoliyatini tashkil etish, ishsizlik nafaqasini tayinlash hamda to'lash choralari ko'rish orqali bandligini ta'minlash;

yoshlarni ish bilan ta'minlashga e'tibor qaratish. Bu borada, O'zbekiston Respublikasi Vazirlar Mahkamasi, tuman hokimligi tomonidan berilgan topshiriqlarni bajarishda barcha pog'onadagi mas'ul xodimlarning mas'uliyati va javobgarligini oshirish;

aholi o'rtasida "Korrupsiyaga qarshi kurashish to'g'risida"gi Qonunning huquqiy targ'ibotini yanada kengaytirish dasturlarini ishlab chiqish va amalga oshirish, bunda asosiy e'tiborni o'zini-o'zi boshqarish organlariga qaratish;

fuqarolar o'rtasidagi o'zaro nizolar, sodir etilayotgan huquqbuzarliklar sudgacha bo'lgan jarayonda yarashtiruv dalolatnomlari orqali ham hal etish kabi masalalarni ommaviy axborot vositalarida, ochiq muloqat tashkil etish topirilsin.

3. "Qonuniylikni ta'minlash va korrupsiyaga qarshi kurashish masalalari bo'yicha doimiy komissiyasi" (T.Radjabov), tuman prokurori (S.Saidov), tuman hokimining o'rinbosari, mahalla va oilani qo'llab quvvatlash bo'limi boshlig'i (A.Xazratkulov)larga:

jinoyatchilik va huquqbuzarliklar, oilaviy ajrimlar eng ko'p qayd etilgan mahalla fuqarolar yig'inini aniqlash, bunday holatlarining oldini olish bo'yicha aniq choralar belgilash va ular bilan doimiy tushuntirish-targ'ibot ishlarini tashkil etish;

eng namunali mahalla fuqarolar yig'inini aniqlab rag'batlantirish choralarini ko'rish va ularning ish faoliyatlarini ommalashtirish uchun takliflar qilsin.

4. Xalq deputatlari tuman Kengashining "Qonuniylikni ta'minlash va korrupsiyaga qarshi kurashish masalalari bo'yicha doimiy komissiyasi" (T.Radjabov) tumandagi mahalla fuqarolari yig'inlarida jinoyatchilik va huquqbuzarliklarning oldini olish bo'yicha deputatlarning faoliyati yuzasidan hisobotini sessiya muhokamasiga kiritsin.

5. Mazkur qaror bajarilishini nazorat qilish xalq deputatlari tuman Kengashining "Qonuniylikni ta'minlash va korrupsiyaga qarshi kurashish masalalari bo'yicha doimiy komissiyasi" (T.Radjabov) va tuman hokimining sohalar bo'yicha o'rinbosarlari zimmalariga yuklansin.

Kengash raisi


B. Baxramov